



Broj: 01-04-2095/22-AP-10

Datum: 20.7.2022. godine

Z A P I S N I K (I Z V O D)

sa 4. sjednice Gradskog vijeća Zavidovići koja je održana, dana 20. 7. 2022. godine (petak) sa početkom u 14.00 sati u velikoj sali zgrade gradskih organa u Zavidovićima.

Sjednici Gradskog vijeća prisustvovalo 28 vijećnika: Avdičević Amer, Avdičević Zahid, Bošnjaković Hakija, Čatić Refik, Džinić Hamdo, Fojnica Admir, Hodžić Haris, Bajramović Maja, Jusić Šefik, Kaknjašević Ferid, Latifović Ramiz, Mahovac Adi, Merdić Smailhodžić Erna, Mujanović Haris, Mujić Emir, Mujkić Admir, Mujkić Rasim, Osmić Hakija, Polić Ajdin, Sinanović Asim, Skejić Samir, Skejić Šemsudin, Šimšić Igor, Tuzlić Fehim, Imamović Armin, Fehrić Šemso, Dohranović Almin i Bečić Mirsad.

Odsutni vijećnici: Buljubašić Demir.

Osim vijećnika sjednici prisustvovali: sekretar Gradskog vijeća - Samira Pinjić, predsjednik Komisije za pitanja boraca i tekovina Odbrambeno-oslobodilačkog rata - Adis Mahovac, pomoćnik gradonačelnika Službe za upravu finansija, budžet i trezor - Midhat Bajramović, šef Odsjeka za budžet i finansije - Amira Tadić, Gradski pravobranilac - Nijaz Karahasanović, predsjednik Komisije za poslove mjesnih zajednica - Hakija Mujanović, referent za poslove Općinskog vijeća - Eniz Kurtalić i lice na stručnom osposobljavanju u službama za upravu i posebnim službama Grada Zavidovići – Elma Karanović.

Ispred sredstava informisanja sjednici prisustvovali: Željko Šlipogor - Radio 1503 Zavidovići, Diana Starčević - Smart televizija d.o.o. Tešanj i Amar Buljubašić - Afirmacija Z Media.

Zapisnik i ostale administrativno - tehničke poslove obavljala je Hajrudina Hadžić - viši samostalni referent za administraciju i opće poslove.

Na osnovu člana 81. Poslovnika o radu Općinskog vijeća Zavidovići, predsjedavajuća Gradskog vijeća predložila je verifikaciju Zapisnika (Izvod) sa 3. sjednice Gradskog vijeća održane, dana 30. 6. 2022. godine.

Predsjedavajuća Gradskog vijeća konstatuje da je Gradsko vijeće sa 26 glasova ZA, 0 PROTIV, 0 UZDRŽANIH (odsutni vijećnici: Maja Bajramović, Amer Avdičević i Demir Buljubašić) usvojilo izvod iz Zapisnika sa 2. sjednice Gradskog vijeća održane, dana 30. 6. 2022. godine.

Z A K L J U Č A K

1. Gradsko vijeće Zavidovići usvaja Zapisnik (Izvod) sa 3. sjednice Gradskog vijeća Zavidovići, održane 30. 6. 2022. godine, bez primjedbi.

2. Zaključak stupa na snagu odmah.

Na osnovu člana 61. Poslovnika o radu Općinskog vijeća, predsjedavajuća Gradskog vijeća, predložila je sljedeći:

D n e v n i r e d:

1. Vijećnička pitanja, inicijative i odgovori.
 - a) Inicijativa Kluba vijećnika Socijaldemokratske partije BiH u Gradskom vijeću Zavidovići za donošenje Odluke o organizaciji događaja Izbor sportiste godine za 2022. godinu.
 - b) Inicijativa vijećnika Samira Skejića za dodjelu naziva ulica i dodjelu numeričkih oznaka u domaćinstvima u prigradskim i seoskim zajednicama.
2. Prijedlog Izmjena i dopuna Budžeta Grada Zavidovići za 2022. godinu.
3. Prijedlog Odluke o izmjenama i dopunama Odluke o izvršenju Budžeta Grada Zavidovići za 2022. godinu.

(izvjestilac po tačkama 2. i 3.: Midhat Bajramović, pomoćnik načelnika Službe za upravu finansija, budžet i trezor)
4. Prijedlog Odluke o izmjeni Odluke o davanju na korištenje poslovne prostorije u vlasništvu Općine Zavidovići.

(izvjestilac: Samira Pinjić, sekretar Gradskog vijeća)
5. Izvještaja o realizaciji Programa rada Gradskog vijeća Zavidovići za period 01.01. - 30.06.2022. godine.

(izvjestilac: Samira Pinjić, sekretar Gradskog vijeća)
6. Izvještaja o radu Komisija Gradskog vijeća Zavidovići za period 01.01.-30.06.2022. godine.

(izvjestioci: Samira Pinjić, sekretar Gradskog vijeća i predsjednici Komisija)
7. Izvještaj o radu Komisije za utvrđivanje prometne vrijednosti nekretnina za period od 01.01.2022. do 30.06.2022. godine.

(izvjestilac: Almir Ćosić, predsjednik Komisije)

Predsjedavajuća Gradskog vijeća konstatuje da je Gradsko vijeće sa 26 glasova ZA, 0 PROTIV, 0 UZDRŽANIH (odsutni vijećnici: Maja Bajramović, Amer Avdićević i Demir Buljubašić) usvojilo prijedlog dnevnog reda 4. sjednice Gradskog vijeća.

Z A K L J U Č A K

1. Gradsko vijeće Zavidovići usvaja predloženi dnevni red 4. sjednice Gradskog vijeća Zavidovići.
2. Zaključak stupa na snagu odmah i čini sastavni dio dokumentacije Gradskog vijeća.

RAD PO DNEVNOM REDU

Ad.1. - Vijećnička pitanja, inicijative i odgovori.

INICIJATIVE I VIJEĆNIČA PITANJA VIJEĆNIKA HODŽIĆ HARIS:

Predmet: Vijećničko pitanje, dostavlja se

Na osnovu člana 8. i 87. Poslovnika o radu Gradskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Kada će se izvršiti zamjena rasvjetnih tijela u naseljenom mjestu Dolac a koja nisu u funkciji već nekoliko mjeseci?

Direktno pitanje:

Kada nadležna služba može pokrenuti aktivnosti na zamjeni cca 50 rasvjetnih tijela u naseljenom mjestu Dolac?

Obrazloženje:

Malobrojni mještani naseljenog mjesta Dolac su prije nešto više od godinu dana dobili funkcionalnu uličnu rasvjetu koja se prostire u dužini od cca 4 kilometra kroz naseljeno mjesto i preko 100 rasvjetnih tijela. U periodu od 15 mjeseci skoro pola rasvjetnih tijela nije više u funkciji a mještani ovog naselja nisu u mogućnosti obezbijediti finansijska sredstva za njihovu zamjenu. Savjet MZ Dolac, također zbog jako malih prihoda po osnovu redovnih sredstava koja se uplaćuju od strane općine, nije u mogućnosti finansirati ovako veliki finansijski poduhvat na zamjeni velikog broja rasvjetnih tijela.

Od nadležnih zahtijevam jasne odgovore u pismenoj formi.

Vijećničko pitanje upućuje se nadležnoj općinskoj službi.

S poštovanjem,

Predmet: VIJEĆNIČKO PITANJE, dostavlja se

Na osnovu članova 8. i 87. Poslovnika o radu Općinskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Tražim od nadležne službe i Kantonalne direkcije za ceste da nam dostavi informaciju kada mještani naseljenog mjesta Donja Blizna mogu očekivati postavku putokazne table na regionalnom putu R465 Zavidovići – Maglaj sa oznakom naseljenog mjesta „DONJA BLIZNA“ ?

Direktno pitanje:

Tražim od nadležne službe i Kantonalne direkcije za ceste da nam dostavi informaciju da li je i kada je u planu postavka putokaznog znaka za naseljeno mjesto Donja Blizna?

Obrazloženje:

Naselje Donja Blizna sa preko 20 stambenih jedinica, smješteno je neposredno uz regionalnu cestu Zavidovići – Maglaj a na kojoj trenutno ne postoji ni jedan saobraćajni znak za oznaku naseljenog mjesta DONJA BLIZNA a što je trenutno veliki problem obzirom da se mještani ovog naselja konstantno žale da veliki broj dostavljača, prijevoznika i posjetioca ove lokacije ne mogu jednostavno pronaći ovu destinaciju, preskoče i često „lutaju“ do pronalaska odredišta – naseljenog mjesta Donja Blizna.

S toga je prijeko potrebno izvršiti postavku vertikalne saobraćajne signalizacije sa oznakom ovog naseljenog mjesta.

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnoj općinskoj službi, Kantonalnoj direkciji za ceste i ovlaštenom pravnom licu za održavanje ove dionice puta Hajdić d.o.o. Maglaj.

S poštovanjem,

Predmet: VIJEĆNIČKO PITANJE, dostavlja se

Na osnovu članova 8. i 87. Poslovnika o radu Općinskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Tražim od nadležne gradske službe i Komisije za vršenje nadzora nad provođenjem ugovora o podršci projektu zbrinjavanja napuštenih pasa da nam dostave sve zaprimljene finansijske izvještaje azila UG Životinjsko carstvo Arma.

Direktno pitanje:

Tražim nadležne službe i gore navedene Komisije da nam dostavi finansijske izvještaje azila za pse UG Životinjsko carstvo Arma a koje je dostavljeno radi pravdanja utrošenih finansijskih sredstava.

Finansijske izvještaje je potrebno dostaviti svaki mjesec.

Također, uz izvještaj potrebno je dostaviti i datume isplate pravdanih sredstava prema UG Životinjsko carstvo Arma uplaćenih od strane općine Zavidovići.

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnoj gradskoj službi, Komisiji za vršenje nadzora nad provođenjem ugovora o podršci projektu zbrinjavanja napuštenih pasa i pasa lutalica u urbanim sredinama općine Zavidovići.

S poštovanjem,

Predmet: VIJEĆNIČKO PITANJE, dostavlja se

Na osnovu članova 8. i 87. Poslovnika o radu Općinskog vijeća Zavidovići, kao vijećnik Gradskog vijeća Zavidovići postavljam sljedeće vijećničko pitanje: Zašto je tabla (billboard) dobrodošlice na ulazu u Grad Zavidovići iz pravca Maglaj na regionalnom putu R465 postavljena neposredno na skretanju za naseljeno mjesto Uljići umjesto na početak gradske zone?

Direktno pitanje:

Tražim nadležne gradske službe informaciju zašto je se i po kojim kriterijima tabla dobrodošlice na ulazu u Zavidoviće iz pravca Maglaja postavila neposredno u blizini skretanja za naseljeno mjesto Uljići umjesto na lokaciju početka urbane zone (lokacija završetka industrijske zone i skretanja za Hajderoviće / Pašin Konak) gdje je i do sada bila tabla sa oznakom „ ZAVIDOVIĆI „ , te da li se moguće i koja je procedura da se navedena tabla izmjesti na početak gradske zone?

Obrazloženje:

Određeni broj mještana koji plaćaju naknadu za gradsko zemljište (pripadaju posljednjoj gradskoj zoni) se žali da je administrativna granica gradske zone instalacijom nove table dobrodošlice pomjerena a time oni stavljeni u položaj građana koji žive van gradske zone a u obavezi su plaćati ovu naknadu.

Od nadležnih zahtijevam jasne odgovore u pisanoj formi.

Vijećničko pitanje upućuje se nadležnoj općinskoj službi.

S poštovanjem,

Predmet: Inicijativa za donošenje odluke o finansiranju kupovine/nabavke vatrogasnog vozila za potrebe Općinske profesionalne vatrogasne jedinice Grada Zavidovići

Poštovani,

na osnovu člana 109. Poslovnika o radu Općinskog vijeća Zavidovići, u ime Kluba vijećnika Socijaldemokratske partije BiH u Općinskom vijeću Zavidovići podnosim INICIJATIVU za donošenje odluke o finansiranju kupovine/nabavke vatrogasnog vozila za potrebe Općinske profesionalne vatrogasne jedinice Grada Zavidovići sa

O B R A Z L O Ž E N J E M kako slijedi:

Obzirom da nadležna služba nije ispoštovala zaključak Gradskog vijeća br. 01-40-2852/21-AP-2 kojom se tražilo održavanje tematske sjednice s ciljem donošenja odluke o nabavci vatrogasnog vozila za potrebe Općinske profesionalne vatrogasne jedinice Zavidovići, ovim putem podnosimo inicijativu za isto, a sve u cilju podizanja opremljenosti vatrogasne jedinice na viši nivo.

O stanju voznog parka profesionalne vatroganske jedinice je suvišno i govoriti, dok stara i nefunkcionalna motorna vozila nisu u stanju adekvatno i brzo odgovoriti na potrebe naših građana. Sredstva za realizaciju ove inicijative predvidjeti Budžetom grada Zavidovići za 2023.

godinu kroz povećanje transfera za rad i podršku Općinske profesionalne vatrogasne jedinice Zavidovići internom preraspodjelom budžetskih sredstava od strane gradonačelnika grada Zavidovići ili kreditnim zaduženjem.

S poštovanjem,

Predsjedavajuća Gradskog vijeća: Armin Imamović, izvolite.

INICIJATIVE VIJEĆNIKA ARMINA IMAMOVIĆ:

Armin Imamović:

PREDMET: INICIJATIVA

Poštovani, na osnovu člana 109. Poslovnika o radu općinskog vijeća Zavidovići Podnosim INICIJATIVU ZA OBJAVU JAVNOG POZIVA ZA ISKAZIVANJE INTERESA ZA UKLANJANJE I ZBRINJAVANJE PASA LUTALICA NA PODRUCJU GRADA ZAVIDOVICI.

U skladu sa poslovníkom INICIJATIVU podnosim u pisanoj formi.

OBRAZLOŽENJE.

Kako je udruženje „ ZIVOTINJSKO CARSTVO ARMA“ pod konstantnim pritisci, opstrukcijama lažnim optužbama i drugim vrstama onemogućavanje normalnog rada od strane jednog dijela članova SDP a, a narucito vijećnika Harisa Hodževića koji na sve moguće načine plasira neprijateljsko raspoloženje među građanima prema ovom udruženju i njenom predsjedniku i osnivaču, te zbog neravnopravnog odnosa u odnosu na druga udruženja koja egzistiraju u gradu udruženje „ ZIVOTINJSKO CARSTVO ARMA“ raskida ugovor sa Gradom Zavidovici.

Između ostalih malicioznih podataka plasiralo se i da vlasnik zemlje i objekta udruženja naplaćuje 3000 KM najamninu što je svakom ko se razumije u pravo glupost i jasno mu je da je na taj način FORMALNO zadovoljen zakon i da bi u suprotnom ta naknada bila veća od godišnjeg budžeta predviđenog rada azila.

Kako se osjećam dužnim da grad ne bude dugo bez te vrste usluge i ponovo ne postane talac nekontrolisanih copora pada podnosim gore navedenu inicijativu sa preporukom da kao stručna pomoć gradonačelniku ili komisiji koja će odlučivati o narednom ugovoru pravnom ili fizičkom licu i da bude i vijećnik Haris Hodžić a isto tako ga preporučujem kao adresu za sve buduća pitanja građana vezano za probleme pasa u gradu.

Predsjedavajuća Gradskog vijeća: Da li još neko želi postaviti pitanje? Izvolite Osmić.

VIJEĆNIČKO PITANJE VIJEĆNIKA HAKIJE OSMIĆA:

Hakija Osmić:

Uvaženo predsjedništvo, gospodina načelnika nema, kolegice i kolege vijećnici, gosti ,uvaženi mediji, sve vas srdačno pozdravljam i selamim. Ja ću postaviti jedno vijećničko pitanje, a odnosi se na sanaciju klizišta u mjestu, naseljenom mjestu Keseri. Naime postavljam pitanjem gradonačelniku i nadležnim službama zašto do sada ništa nisu poduzeli po tom pitanju sanacije klizišta u naseljenom mjestu Keseri, a koje povezuje nekoliko naseljenih mjesta kao što su dalji odvojak a prema Livadama, prema Delićima, prema Lazu, Pašinu Konaku i tako dalje Huskićima. Gdje su mještani evo maltene bukvalno evo ne u sto postotnom procentu odsječeni od tih naselja, odnosno korištenja i svog naselja u zadnje dvije godine to klizište se pojavilo i oni su riješili to privremeno na način da su zahvatili parcelu susjednu, privatnu parcelu i koriste tu komunikaciju evo, ovaj na nekakvu riječ dok se ne riješi ovo pitanje sanacije klizišta pa evo

molim načelnika, i nadležne službe da ovo pitanje ozbiljno shvate i da ga pokušaju što prije riješiti. Hvala.

Predsjedavajuća Gradskog vijeća: Hvala lijepa. Samo prije nego nastavimo, da konstatujem da je kolega Šemsudin Skejić u pisanoj formi predao svoja 4 vijećnička pitanja prije početka sjednice.

VIJEĆNIČKA PITANJA VIJEĆNIKA ŠEMSUDINA SKEJIĆA:

Predmet: Set vijećničkih pitanja od 1.1 do 1.13 koja se odnose na izvršenje pojedinih transfera predviđenih izmjenama i dopunama budžeta za 2022. godinu

Pitanje br. 1.1.

Konto 613962 izdaci za izvršenje po sudskim presudama i vansudskim nagodbama Planom budžeta grada za 2022. godinu, izmjene i dopune budžeta grada Zavidovići za 2022. godinu, konto 613962, predviđeni su rashodi i izdaci za izvršenje po pravosnažnim sudskim presudama i vansudskim nagodbama u iznosu od 80.713,15 KM.

Moje pitanje je:

1/ da li je ovaj iznos pokriva sve obaveze po pravosnažnim sudskim presudama i vansudskim nagodbama.

2/ ako ima još obavezujućih presuda i vansudskih nagodbi, koji su to iznosi pojedinačno i da li su sačinjeni planovi otplate?

Smatram da ove aktivnosti treba sporovati iz prostog razloga što su zatezne kamate dodatni problem kod pravosnažnih presuda i vansudskih nagodbi, u smislu da nisu rijetki slučajevi da zatezne kamate premaše visinu glavnice.

Da bi smo to izbjegli treba da blagovremeno reagujemo kako dodatni troškovi ne bi još više ugrožavali budžet.

Pitanje br.1.2.

Konto 61399133 transfer za regulacione planove i druge prostorno planske dokumente

Postoji li mogućnost i na koji način će biti utrošeno 25.000 KM koje su izmjenama i dopunama budžeta predviđene za izradu regulacionih planova i drugih prostorno planskih dokumenata?

Ovaj transfer je, izmjenama i dopunama budžeta, smanjen sa 50.000 KM na 25.000 KM bez obzira što su sredstva na prihodovnoj strani za ove namjene povećana za više od 100%.

Kako u 2021. godini sredstva za ovu namjenu uopšte nisu korištena (izuzetak je 1.404 KM), postoji opravdana bojazan da će biti i u 2022. godini.

Pitanje br.1.3.

Konto 613329131 izdaci za javnu rasvjetu, potrošnja električne energije

Kako je moguće da u prvih 5 mjeseci nije bilo aktivnosti na transferu izdaci za javnu rasvjetu – potrošnja električne energije – komunalna naknada?

Pitanje br. 1.4.

Konto 61372411 i konto 61372421 transferi za tekuće održavanje gradskih i prigradskih ulica transferi za tekuće održavanje lokalnih cesta

Ima li opravdanje što za ova dva transfera u prvih 5 mjeseci nije realizovana niti jedna marka, a uočljivo je da je izmjenama i dopunama budžeta predviđeno povećanje transfera za po 50% ?

Pitanje br. 1.5.

Konto 61412217 transfer za muški rukometni klub

Da li će muški rukometni klub u preostalih 7 mjeseci dobiti dodatna sredstva ili će transfer od 100.000 KM ostati ukupan transfer za 2022. godinu kako je i planirano?

U najmanju ruku čudno je da se ukupno predviđeni transfer realizuje 100% u prvih 5 mjeseci budžetske godine.

Pitanje 1.6.

Konto 6143113 tekući transfer za podršku projektima koji se finansiraju iz drugih izvora

Konto 8216122 kapitalni izdaci – podrška projektima koji se finansiraju iz drugih izvora

Po kojim kriterijumima će biti raspoređena sredstva predviđena za ova 2 transfera ako znamo da smo strategijom integriranog razvoja i planom kapitalnih investicija tačno predvidjeli koji će projekti biti realizovani u iznosu ukupno cca 100.000 KM ?

Ova dva transfera, izmjenama i dopunama budžeta, uvećana su za cca 80.000 KM što je pohvalno i opravdano.

Istovremeno povećanje ovih transfera ne prati dopuna kriterijima kako će tih novih 80.000 KM povećanja biti realizovano.

Vjerovatno po „slobodnom uvjerenju“ i sistemu „ko traži i dobije“.

Pitanje br. 1.7.

Konto: tekući transfer za subvencije privredi i za zapošljavanje

Da li je moguće maksimalno skratiti vrijeme realizacije ovog transfera?

Jedino će tako efekt ovog opravdanog prijedloga povećanja transfera biti ostvaren.

Pitanje br. 1.8.

Konto 6152112 kapitalni transfer za sanaciju fasada zgrada kolektivnog stanovanja

Da li je moguće da ovaj iznos bude namjenjen za zgrade koje su obuhvaćene sistemom centralnog grijanja koje realizuje JKP Radnik.

Razlog za to je više nego očigledan.

Na ovaj način utrošak toplotne energije, po svakom rekonstruisanom objektu, bio bi smanjen na 30 – 40 % što je omogućilo smanjenjem troškova u sistemu grijanja.

Pitanje br.1.9.

Konto 6154111 i konto 61541111 troškovi za projektovanje, nabavku i realizaciju video nadzora gradskog područja

Da li je moguće obezbijediti, da nadležni za realizaciju ovih važnih projekata poduzme sve što je potrebno kako bi ovaj proces maksimalno ubrzao i realizovao do kraja godine.

Pitanje br. 1.10.

Konto 8212112 izdaci za nabavku poslovnog prostora

Koji će poslovni prostor biti nabavljen u skladu sa sredstvima iz ovog transfera od 29.166,95 KM

Pitanje br.1.11.

Konto 82122411 nabavka objekta vodovoda i kanalizacije Zakon o građevinskom zemljištu

Izmjenama i dopunama budžeta, ovaj transfer povećan je sa 18.000 KM na 120.000 KM, pa je logično pitanje šta će za taj uvećani iznos biti nabavljeno.

Pitanje br. 1.12.

Konto 821191 nabavka opreme

Koja će oprema biti nabavljena za iznos od 130.000 KM koliko iznosi uvećan transfer za ovu svrhu?

Riječ je o uvećanju od 20.000 KM na 130.000 KM.

Pitanje br. 1.13.

Konto 82162993 kapitalni izdaci za rekonstrukciju i investiciono održavanje – iz sredstava naknade na promet šuma

Postoji li kriteriji (ako postoje koji su) po kojima će biti utrošen iznos uvećanja od 170.000 KM za ovaj transfer?

Još jednom napominjem, mi smo usvojili osnovne planove razvoja i ulaganja po kojima se tačno zna šta smo planirali i uradili u 2022. godini.

Uvećanje sredstava od 170.000 KM jeste očekivano ali kriterija za njihov raspored nema.

Predmet: Set vijećničkih pitanja iz oblasti komunalne higijene

Problematika zbrinjavanja komunalnog otpada

I pored toga što je uočen vidan napredak u oblasti zbrinjavanja otpada na cijeloj teritoriji grada Zavidovići, uočeni su brojni nedostaci i pojave koji umanjuju pozitivne efekte novog načina tretiranja otpada sa područja mjesnih zajednica.

Te pojave su:

1. Premda su mnoge divlje deponije očišćene na neke od njih se ponovo gomila smeće,
2. U nekim mjesnim zajednicama, a pogotovo njihovih rubnim područjima još uvijek su netretirane divlje deponije i na njima se i dalje odlaže smeće.

Primjer najmanje 4 divlje deponije u MZ Pašin Konak, lokalitet koji pripada Perovićima.

3. Pored puta uz Krivaju uzvodno od romskog naselja, posebno kod lokaliteta Hadžijina česma, Panorama i dalje vidljivo gomilanje smeća mimo mjesta odlaganja.

Pretpostavljam da je to smeće koje građani ostavljaju izbacivanjem iz auta ili odlaganjem prilikom izlaska iz auta na mjestima odmara i slično.

4. Gomilanje smeća pored kontejnera institucija također je evidentno.

Razlog tome što se ti kontejneri prazne kada predstavnik institucije javi da su napunjeni.

Obzirom da se plaćanje vrši po ispražnjenu kontejnera ekonomičnije je da se kontejner što rjeđe prazi, a time i rjeđe plaća.

To uzrokuje gomilanje smeća pored kontejnera i neugodne mirise za prolaznike i mještane u susjedstvu.

Moja konkretna pitanja su:

1. Čija je nadležnost prikupljanja i odvoza smeća koje su u manjim količinama ali ipak odlaže pored puta uz rijeku Krivaju, a da pri tome to smeće nije odloženo na za to predviđenom mjestu.

Primjer lokacije pored Hadžijine vode na odvojkju puta kod Panorame i mnoge druge lokacije uz put,

2. Kako nadležne gradske službe i javno komunalno preduzeće misle riješiti problem aktiviranja jednom već očišćenih divljih deponija,
3. Koliko vremena će još proteći prije nego se većina divljih deponija očisti prvi puta,
4. Šta treba poduzeti da bi na red došlo čišćenje najudaljenijih divljih deponija za koje znaju samo oni koji ih pune,
5. Da li je izvodljivo pokrivanje video nadzora nekih od mjesta na koja se ilegalno odlaže otpad.

Najbolji odgovor na moje pitanje, između ostalog, bio bi kada bi va pitanja inicirala javno komunalno preduzeće, odgovarajuće stručne službe i nadležne inspekcije da pristupe izradi plana za povećanje efikasnosti na polju zbrinjavanja otpada.

Na kraju ponavljam konstataciju sa početka mog obrazloženja, a to je:

U 2022. godini smo napravili veliki napredak na polju komunalne higijene.

Taj napredak će biti još veći samo ako budemo napravili dobar plan i slijedili ga u potpunosti.

Predmet: Vijećničko pitanje br. 3 Kašnjenje u dostavljanju, na dnevni red sjednice vijeća, vijećničkih inicijativa i inicijativa udruženja građana

Članom 109 Poslovnika o radu Općinskog vijeća predviđeno je da vijećničke i građanske inicijative uđu u proceduru rješavanja u roku od 30 dana od datuma podnošenja.

Činjenica je da su ti rokovi mnogo duži.

Nerijetko inicijativa ne uđe u proceduru ni za 120 dana od dana upućivanja.

Analizirajući program rada vijeća koji se nalazi na dnevnom redu 4. sjednice gradskog vijeća, nisam mogao zaključiti koliko vijećničkih, a koliko građanskih inicijativa upućeno, a da još nije dospjelo na dnevni red.

Zbog toga postavljam slijedeća pitanje:

Pitanje prvo:

Koliko vijećničkih i koliko inicijativa udruženja građana još nisu dospjele na dnevni red vijeća, koje su to inicijative i u kom roku možemo očekivati dostavljanje mišljenja o istim.

Dostavljanjem traženih podataka mogli bi smo lakše planirati kako riješiti kršenje u radu po ovoj problematici pa ako treba i promijeniti poslovnik na način da rok od 30 dana povećamo na recimo 60 dana, ali da se držimo poslovnika.

Pitanje drugo:

Kada će zaključci o prihvatanju vijećničkih i inicijativa građana ući u proces praktične realizacije. Svjedoci smo da je broj podnešenih inicijativa, u tekoćem mandatu općinskog gradskog vijeća, prevelik. Nastavimo li ovako, na kraju našeg mandata, taj broj će se mjeriti stotinama. Evidentno je da je broj prihvaćenih inicijativa zabrinjavajući mali. Isto tako može se zaključiti da je veliki broj inicijativa opravdano odbijen. Ovdje govorim o inicijativama koje je vijeće prihvatilo i naložilo da se pristupi njihovoj realizaciji. Stiče se utisak da za veliki broj, od ono malo prihvaćenih inicijativa, realizacija nije ni na pomolu.

Praksa je da su u realizaciji zaključci tzv. „trivijalnih“ inicijativa za koje nisu potrebna finansijska sredstva, niti previše utroška radnog vremena onih koji su zaduženi za realizaciju. Nisam primijetio da je u toku realizacija sveobuhvatnih inicijativa. Najkvalitetniji odgovor na ovo pitanje bio bi: prezentacija plana aktivnosti realizacije zaključaka o prihvatanju vijećničkih i inicijativa udruženja građana.

Predmet: Vijećničko pitanje br.4 vezano za izvod iz regulacionog plana CENTAR II, a koji se odnosi na lokaciju – vlasništvo RK KRIVAJA koja je predmet prodaje

OBRASLOŽENJE:

Svjedoci smo sve učestalijih prodaja zemljišta na prostoru našeg grada. Trenutno je najaktuelnija prodaja zemljišta u vlasništvu RK KRIVAJA. Za očekivati je da će ova prodaja biti realizovana u skoroj budućnosti. Pri tome će vrijeme pokazati koliko će ta transakcija biti korisna ili promašena investicija. Moje skromno iskustvo govori da udruženja građana nisu kapacitirana da takve transakcije mogu završiti bez negativnih posljedica za društvenu zajednicu. Tako je prva prodaja – licitacija propala vjetovatno samo zbog toga što je depozit bio 20.000 KM, a ne 10 % početne cijene. Analizirajući izvod iz regulacionog plana CENTAR II, vidljivo je da predmetna lokacija sadrži uglavnom sportske terene (rukomet – mali nogomet, basket i tenis) kao i parking za pravne subjekte u susjedstvu.

Na 3. sjednici gradskog vijeća podnešena je inicijativa koja se odnosi na teniske terene bez kojih bi grad mogao ostati. Ali to nije predmet mog pitanja.

Jasno je da će nakon prodaje ovog lokaliteta doći do promjene regulacionog plana na što se i odnosi moje pitanje.

Da li je izradom novog regulacionog plana moguće riješiti problem parking prostora za pravna i fizička lica, sadašnje i buduće korisnike.

Ako je to ikako moguće, to treba omogućiti tokom promjene regulacionog plana CENTAR II ili eventualno izrade Urbanističkog plana grada.

Predsjedavajuća Gradskog vijeća: Fojnica izvolite.

INICIJATIVA I VIJEĆNIČKO PITANJE VIJEĆNIKA FOJNICA ADMIR:

Predmet: Vijećničko pitanje,

Poštovani/a,

Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća postavljam vijećničko pitanje.

OBRAZLOŽENJE:

Na šestoj redovnoj sjednici Općinskog vijeća podnio sam Inicijativu za oslobađanje plaćanja taksi pri izgradnji prvog objekta individualnog stanovanja za malde bračne parove do 35 godina starosne dobi.

Tražim odgovor u pisanoj formi, zašto tako jedna bitna Inicijativa za naše mlade nikad nije obrađena i dostavljena na neku od sjednica Općinskog vijeća, vijećnicima na razmatranje i izjašnjavanje po istoj.

Predmet: Inicijativa za sanaciju i obnovu Omladinskog doma u naseljenom mjestu Potklečje (MZ Klek)

Poštovani/a,

Na osnovu člana 109. Poslovnika o radu Općinskog vijeća Zavidovići, podnosim Inicijativu za sanaciju i obnovu Omladinskog doma u naseljenom mjestu Potklečje (MZ Klek).

U skladu sa stavom 4. pomenutog člana inicijativu dostavljam u pisanoj formi.

OBRAZLOŽENJE:

Omladinski dom u naseljenom mjestu Potklečje izgrađen je još davnih 80 –tih godina. Korišten je za potrebe Mjesne zajednice, koristili su ga mladi, a svake dvije godine prostor Omladinskog doma koristi se za potrebe održavanja izbora. S obzirom da je posljednjih nekoliko godina dom u veoma lošem stanju, električne instalacije ne rade, mokri čvor neuređen, prozori zastarjeli i oštećeni što osobama koje na izborni dan borave i po 24 sata ozbiljno narušava zdravstveno stanje. Ovom inicijativom tražim da se iz Gradskog budžeta izdvoji dio sredstava za njegovu obnovu, svakako uz učešće i Mjesne zajednice Klek u čijem je vlasništvu.

Predsjedavajuća Gradskog vijeća: Hvala lijepa. Skejić Samir izvolite.

INICIJATIVE I VIJEĆNIČKA PITANJA VIJEĆNIKA SKEJIĆ SAMIR:

Predmet: Inicijativa za donošenje odluke o dodjeli poslovne prostorije u vlasništvu Grada Zavidovići na korištenje bez naknade na period od 5 godina u Sali broj 6, u zgradi boračkih udruženja zvanoj „Spomen kuća“ u ulici Mehmed paše Sokolovića br.10. Jedinственом удруženju демобилисаних борца 92 -95 Завидовићи уписаном у Регистру удруženja Федерације БиХ рјешенjem број: 03 - 05 – 2 – 242/19.

Na osnovu člana 99 statuta Općine Zavidovići, član 109 Poslovnika o radu Općinskog vijeća Zavidovići. Član 13 stav 1 alineja 5 i člana 35 Zakona o principima lokalne samouprave u FBiH. Člana 5, stav 2 odluke o zakupu prostorija u vlasništvu Općine Zavidovići i zaključka Općinskog vijeća Zavidovići od 17.06.2020. godine broja 01.19-85/20-AP-9 Gradskom vijeću podnosim:

INICIJATIVU

Za donošenje odluke o dodjeli poslovne prostorije u vlasništvu Grada Zavidovići na korištenje bez naknade na period od pet godina u Sali broj 6, u zgradi boračkih udruženja zvanog „Spomen kuća“ u ulici Mehmed paše Sokolovića br. 10, jedinstvenom udruženju demobilisanih boraca 92-95 Zavidovići upisanom u Registru udruženja Federacije BiH rješenjem broja: 03-05-242/19.

OBRAZLOŽENJE:

Na osnovu i radi izvršenih zaključaka Općinskog vijeća Zavidovići od 17.06.2020. godine broj 01-19-85/20-AP-9 a u vezi s utvrđenim činjeničnim stanjem da je Jedinstveno udruženje demobilisanih boraca 92-95 jedini predstavnik demobilisanih boraca u Gradu Zavidovići prema ustanovljenom odgovoru na vijećnička pitanja koja su udruženja podnosila uz inicijative za ostvarenje prava i interesa boraca a kroz dostavljene odgovore od strane nadležne službe vijeća ispostavlja se da smo jedini u periodu od 2018. godine do danas podnijeli 11 inicijativa i 1 zahtjev za sazivanje i održavanje tematske sjednice na temu poboljšanja socijalnog i statusnog položaja ove populacije te u želji da ublažavanjem tenzija postignemo kompromisno rješenje.

Obzirom na činjenicu da je jedino jedinstveno udruženje demobilisanih boraca ostalo uskraćeno za konzumaciju zakonom garantovanih prava dok istovremeno druga udruženja imaju zakonska prava podsjetiću da je ovo udruženje zaslužno za donošenje zakona o pravima demobilisanih boraca na osnovu kojih veliki dio demobilisanih boraca iz Zavidovića ostvaruje pravo sa federalnog i kantonalnog nivoa posebno u pogledu egzistencijalnih naknada i priključaka na inostrukturu mrežu te subvencije općinskih i gradskih nivoa.

Napomena: Realizacija predmetne inicijative ne iziskuje finansijska sredstva.

Predmet: Inicijativa za izmiještanje bankomata

OBRAZLOŽENJE:

Poštovani prisutni, molim za malo pažnje. U interesu reguliranja javnog saobraćaja predlažio bih Vam da u užoj gradskoj zoni skladnije osmislimo zone u kojima se primjećuje nepotrebnosti saobraćajni promet i zagušenja saobraćaja, a naročito ako je gradska administracija za urbanističko planiranje na izvjestan način doprinosila njihovoj pojavi neadekvatnim odabirom lokacija ili umanjanim interesom da se očuva protočnost u saobraćaju. Vjerujem da priželjkujemo trenutak u kojem će naš grad dobiti efikasnu urbanističku formu kreiranu u skladu s najvišim ekološkim, estetskim i urbanističkim standardima te Vas molim da svojim učešćem podržite zamisao o dislokaciji dijela uslužnih djelatnosti koje ograničavaju normalno odvijanje saobraćaja. Za početak predlažem da se razmisli o dislokaciji bankomata u užem gradskom području u zone sa neopterećenim saobraćajem ili zone sa riješenim problemom parkirališta i u prazničnom periodu kad je grad zagušen našim građanstvom iz evropskih zemalja.

Realizacija inicijative iziskuje stanovita finansijska sredstva i treba ih predvidjeti pri izradi budžeta Grada Zavidovići.

Inicijativu podnosim u skladu sa članom 109. u pisanoj formi.

S poštovanjem,

Predmet: Vijećnička pitanja,

1. Pitanje za nadležnu gradsku službu:

Obzirom da su četiri vijećnika OV/GV-a u 2021. godini istupili iz članstva u parlamentarnim strankama zanima me kakav je pravni status novčanih sredstava iz parlamentarnog fonda u kojem su trebal participirati i navedeni vijećnici i kako je pravno riješen utrošak ovog dijela sredstava koji po slovu zakona pripada navedenim vijećnicima.

2. Zašto se odgovori na vijećnička pitanja dostavljaju u posljednji ili pretposljednji dan uoči sjednice vijeća?
3. Zašto se na ljekare Doma zdravlja vrši izravan uticaj od strane Načelnika da revidiraju pravo na bolovanje nekim uposlenicima gradske službe i uposlenicima Općine? Dopis o potrebi revizije poslan na adresu svih ordinirajućih ljekara.

4. Pročitat ću pitanje u ime naše građanke A. Omerčić bez naknadnih intervencija u tekstu. Esalam alejkum i lijep pozdrav – ja imam jedno malo poduže izlaganje a u tom izlaganju i pitanje na koje bi mi neko odgovori ako može, ne znam ko pravi plan i raspored rada ovih ambulanti po mjesnim zajednicama ove porodične medicine. Mene zanima isključivo ambulanta Kovači i njen plan rada – zašto se mijenja radno vrijeme? I mi smo ljudi i kod nas ima bolesnih kao u Dolini zašto nama daju u zimskom periodu jutarnje vrijeme kad je hladno i onako iz tople posteljine hajde doktoru a sad kad treba da idemo ujutro dok ne ugrije nama pomjereno radno vrijeme doktora od 12-3 pa i mi smo ljudi nije samo u Dolini ja ne znam zašto nam ne ostave jedno radno vrijeme za stalno pa da li je to ujutro ili od podne nije uopšte bitno samo da ne bude mijenjanja kako drugim odgovara, hvala unaprijed – ako dobijem obašnjenje.

Predsjedavajuća Gradskog vijeća: Hvala lijepa. Mujkić Admir izvolite.

INICIJATIVA I VIJEĆNIČKA PITANJA VIJEĆNIKA MUJKIĆ ADMIR:

Predmet: Inicijativa za subvenciju troškova smještaja i boravka djece u predškolskim ustanovama

Poštovani,

Na osnovu člana 109. Poslovnika o radu Gradskog vijeća Zavidovići, podnosim inicijativu za subvenciju troškova smještaja i boravka djece u predškolskim ustanovama

U skladu sa stavom 4. pomenutog člana inicijativu prilažem u pisanoj formi.

OBRAZLOŽENJE:

Podnosim ovu inicijativu u smislu olakšanja roditeljima koji imaju jedno, dvoje ili više djece. Samim time bi smo pokazali i brigu o najmlađem uzrastu naše populacije, koji nam mora biti svemu na pravom mjestu.

Prijedlog nadležnoj službi može biti sljedeći da procentualno u ovisnosti od broja djece zavisi i iznos koji će se subvencionirati (roditelji sa jednim djetetom dobije jedan iznos, za drugo dijete npr drugi iznos/malo veći, za treći neki opet treći iznos itd.), neka nadležna služba u ovisnosti i sa svojim mogućnostima procijeni koji je koncept i na koji način moguć i prihvatljiv u ovisnosti od raspoloživosti budžeta.

Nadležnim Gradskim službama dajem na raspolaganje da sredstva za ovu inicijativu obezbijede internom preraspodjelom budžeta, eventualnim rebalansom ili u nekoj posljednjoj opciji sa sredstva planiramo u budžetu za 2023-ću godinu.

Predmet: Vijećničko pitanje

Poštovani,

Na osnovu članova 8. i 87. Poslovnika o radu Gradskog vijeća Zavidovići, kao vijećnik Gradskog vijeća postavljam vijećničko pitanje

Uputit ću nekoliko pitanja prema Domu zdravlja i izričito tražim blagovremene odgovore u pisanoj formi. Sva su pitanja izraz želje našeg građanstva da jednog dana imaju zdravstveni sistem koji će u potpunosti zadovoljiti njihovo ljudsko pravo na dobru i optimalnu zdravstvenu skrb.

- Zašto se na usluge fizijatrijske službe čeka nedopustivo dugo i koliki je broj pregledanih pacijenata u ovoj službi po svakom danu?
- Da li je pri ustanovi zabranjen politički prozelitizam i politička promidžba za trajanja izborne kampanje?
- Zamoliću za potpun izvještaj kad i koliko edukativnih predavanja za potrebe zdravstvenog prosvjećivanja stanovništva je održano u periodu januar – juli 2022. godine i ko je od ljekara sudjelovao u pomenutim projektima?

Predsjedavajuća Gradskog vijeća: Hvala kolega Mujkić. Fehrić Šemso izvolite.

VIJEĆNIČKA PITANJA VIJEĆNIKA FEHRIĆ ŠEMSO:

Predmet: Vijećnička pitanja za 4. sjednicu Gradskog vijeća Zavidovići

U skladu sa članom 89. Poslovnika o radu OV Zavidovići, postavljam vijećničko pitanje:

1. Kada će sanirati raskrsnica ulica Podubravlje i Dubravački put? Činjenica je da 18 godina prelazimo preko istih rupa, a ništa se nije poduzelo.
2. Kada će se riješiti klizište na lokalnom putu Zavidovići – Stavci – Gornji Kovači, u mjestu Kratkovići?
3. Da li će se održati manifestacija „Ljeto u gradu“ ove godine? Ako neće zašto neće, ako već imaju namjenska sredstva za te namjene?

Predsjedavajuća Gradskog vijeća: Hvala kolega Fehrić. Da li se još neko javlja za pitanje ili da uputi inicijativu ? Ukoliko ne, nakon postavljenih vijećničkih pitanja, prelazimo na odgovore iz službe ukoliko ih ima. Nema. Prelazimo na odgovore na vijećnička pitanja postavljena na 2. sjednici Gradskog vijeća Zavidovići održanoj dana 30.05.2022. godine, da li ste zadovoljni sa odgovorima? Haris Hodžić da li si zadovoljan sa 2 pitanja?

Haris Hodžić: Nisam.

Predsjedavajuća Gradskog vijeća: Imate dopunsko.

Haris Hodžić: Nemam.

Predsjedavajuća Gradskog vijeća: Amer Avdičević nije prisutan.

Odgovori na vijećnička pitanja postavljena na 3. sjednici Gradskog vijeća Zavidovići održanoj dana 30.06.2022. godine, da li ste zadovoljni sa odgovorima ili imate dopunska pitanja? Samir Skejić tri pitanja, imate dopunsko izvolite?

Samir Skejić: Budući da je bilo dosta pitanja, nisam zadovoljan skoro pa ni na jedno pitanje. Pa bih molio da se ta i odgovori na nekoj narednoj sjednici malo upotpune. Prije svega nisam zadovoljan odgovorima koji su nam prispjeli iz Doma zdravlja, ne trebate nas uvjeravati da se na konkursima ne može napraviti razlika između diplome učenika školovanog u vanrednom i redovnom režimu postoje strahovite razlike u diplomi i vide se na prvi pogled. Jedno od pitanja bilo je upućeno Načelniku, nisam zadovoljan izvještajem o utrošku sredstava u podružnici Perovići budući da je pitanje samo polovično opservirano. Nisam dobio odgovor na najpikantniji detalj, a tiče se koliko je novca uloženo u putnu infrastrukturu u podružnicu Peroviće, a koliko u pojedini rad našeg domaćinstva. Ovaj drugi dio pitanja ostao je ne tretiran. Zaista mi je žao da načelnika nema ovde, nadam se da će se pojaviti. Hvala vam.

Predsjedavajuća Gradskog vijeća: Haris Hodžić 5 postavljenih pitanja.

Haris Hodžić: Nisam, nemam dopunsko.

Predsjedavajuća Gradskog vijeća: Hakija Bošnjaković jedno?

Hakija Bošnjaković: Zadovoljan.

Predsjedavajuća Gradskog vijeća: Nema dopunskog?

Hakija Bošnjaković: Nema

Predsjedavajuća Gradskog vijeća: Hakija Osmić dva?

Hakija Osmić: Zadovoljan.

Predsjedavajuća Gradskog vijeća: Igor Šimšić odgovori, dopunsko pitanje?

Igor Šimšić: Nisam zadovoljan, nemam dopunsko.

ZAKLJUČAK

1. Vijećnici Gradskog vijeća Zavidovići razmatrajući odgovore na vijećnička pitanja sa 2. sjednice Gradskog vijeća održane dana 30.05.2022. godine, izjasnili su se:

Haris Hodžić: Nije zadovoljan odgovorima na 1. i 2. postavljeno vijećnička pitanje, nema dopunsko pitanje.

Amer Avdičević: odsutan.

2. Vijećnici Gradskog vijeća Zavidovići razmatrajući odgovore na vijećnička pitanja sa 3. sjednice Gradskog vijeća održane dana 30.06.2022. godine, izjasnili su se:

Samir Skejić: Nije zadovoljan odgovorima na 1., 2., 3., 4. i 5. Postavljeno vijećničko pitanje. Ima dopunsko pitanje: „Budući da je bilo dosta pitanja, nisam zadovoljan skoro pa ni na jedno pitanje. Pa bih molio da se ta i odgovori na nekoj narednoj sjednici malo upotpune. Prije svega nisam zadovoljan odgovorima koji su nam prispjeli iz Doma zdravlja, ne trebate nas uvjeravati da se na konkursima ne može napraviti razlika između diplome učenika školovanog u vanrednom i redovnom režimu postoje strahovite razlike u diplomu i vide se na prvi pogled. Jedno od pitanja bilo je upućeno Načelniku, nisam zadovoljan izvještajem o utrošku sredstava u podružnici Perovići budući da je pitanje samo polovično opservirano. Nisam dobio odgovor na najpikantniji detalj, a tiče se koliko je novca uloženo u putnu infrastrukturu u podružnicu Peroviće, a koliko u pojedini rad našeg domaćinstva. Ovaj drugi dio pitanja ostao je ne tretiran.“

Haris Hodžić: Nije zadovoljan odgovorima na 1., 2., 3., 4. i 5. postavljeno vijećničko pitanje, nema dopunsko pitanje.

Hakija Bošnjaković: Zadovoljan odgovorom na postavljeno vijećničko pitanje.

Hakija Osmić: Zadovoljan odgovorima na 1. i 2. postavljeno vijećničko pitanje.

Igor Šimšić: Nije zadovoljan odgovorom, nema dopunsko pitanje.

3. Zaključak stupa na snagu odmah.

Ad.2. - Prijedlog Izmjena i dopuna Budžeta Grada Zavidovići za 2022. godinu.

Predsjedavajuća Gradskog vijeća konstatuje da je Gradsko vijeće sa 17 glasova ZA, 0 PROTIV, 9 UZDRŽANIH (odsutni vijećnici: Amer Avdičević, Armin Imamović i Demir Buljubašić) prihvatilo da se Prijedlog Izmjena i dopuna Budžeta Grada Zavidovići za 2022. godinu raspravlja po skraćenom postupku.

Z A K L J U Č A K

1. Gradsko vijeće Zavidovići prihvata da raspravlja Prijedlog Izmjena i dopuna Budžeta Grada Zavidovići za 2022. godinu, po skraćenom postupku bez nacрта.

2. Zaključak stupa na snagu danom donošenja.

Uvodno izlaganje po predmetnoj tački dnevnog reda podnio je Midhat Bajramović.

U raspravi učestvovali: Šemso Fehrić, Hakija Osmić, Rasim Mujkić, Zahid Avdičević, Admir Fojnica, Haris Mujanović, Refik Čatić, Midhat Bajramović,

Predsjedavajuća Gradskog vijeća konstatuje da je Gradsko vijeće sa 19 glasova ZA, 5 PROTIV, 2 UZDRŽANIH (odsutni vijećnici: Amer Avdičević, Armin Imamović i Demir Buljubašić) prihvatilo Prijedlog Izmjena i dopuna Budžeta Grada Zavidovići za 2022. godinu.

Ad.3. - Prijedlog Odluke o izmjenama i dopunama Odluke o izvršenju Budžeta Grada Zavidovići za 2022. godinu.

Predsjedavajuća Gradskog vijeća konstatuje da je Gradsko vijeće sa 19 glasova ZA, 0 PROTIV, 6 UZDRŽANIH (odsutni vijećnici: Maja Bajramović, Adi Mahovac, Amer Avdičević i Demir Buljubašić) prihvatilo da se Prijedlog Odluke o izmjenama i dopunama Odluke o izvršenju Budžeta Grada Zavidovići za 2022. godinu raspravlja po skraćenom postupku.

Z A K L J U Č A K

1. Gradsko vijeće Zavidovići prihvata da raspravlja Prijedlog Odluke o izmjenama i dopunama Odluke o izvršavanju Budžeta Grada Zavidovići za 2022. godinu, po skraćenom postupku bez nacрта.

2. Zaključak stupa na snagu danom donošenja.

U raspravi nije bilo učesnika.

Predsjedavajuća Gradskog vijeća konstatuje da je Gradsko vijeće sa 18 glasova ZA, 4 PROTIV, 3 UZDRŽANIH (odsutni vijećnici: Maja Bajramović, Adi Mahovac, Amer Avdičević i Demir Buljubašić) prihvatilo Prijedlog Odluke o izmjenama i dopunama Odluke o izvršenju Budžeta Grada Zavidovići za 2022. godinu.

Ad.4. - Prijedlog Odluke o izmjeni Odluke o davanju na korištenje poslovne prostorije u vlasništvu Općine Zavidovići.

U raspravi nije bilo učesnika.

Predsjedavajuća Gradskog vijeća konstatuje da je Gradsko vijeće sa 24 glasa ZA, 0 PROTIV, 0 UZDRŽANIH (odsutni vijećnici: Amer Avdičević, Demir Buljubašić, Samir Skejić, Fehim Tuzlić i Armin Imamović) prihvatilo Prijedlog Odluke o izmjeni Odluke o davanju na korištenje poslovne prostorije u vlasništvu Općine Zavidovići.

Ad.5. - Izvještaja o realizaciji Programa rada Gradskog vijeća Zavidovići za period 01.01. - 30.06.2022. godine.

U raspravi nije bilo učesnika.

Predsjedavajuća Gradskog vijeća konstatuje da je Gradsko vijeće sa 15 glasova ZA, 8 PROTIV, 1 UZDRŽANIH (odsutni vijećnici: Amer Avdičević, Demir Buljubašić, Samir Skejić, Fehim Tuzlić i Armin Imamović) prihvatilo Izvještaja o realizaciji Programa rada Gradskog vijeća Zavidovići za period 01.01. - 30.06.2022. godine.

ZAKLJUČAK

1. Gradsko vijeće Zavidovići usvaja Izvještaj o realizaciji Programa rada Gradskog vijeća Zavidovići za period 01.01. - 30.06.2022. godine, sa prijedlogom mjera:

- nastaviti aktivnosti na uvođenju informacionog sistema namijenjenog za pripremu i održavanje sjednica Gradskog vijeća i radnih tijela Vijeća, u skladu sa planiranim sredstvima u Budžetu Grada Zavidovići za 2022. godinu;

- zadužuje se Stručna služba Gradskog vijeća da na sjednice Kolegija Gradskog vijeća obavezno poziva Gradonačelnika sa svim pomoćnicima Gradonačelnika i Pravobranioca Grada Zavidovići.

2. Zaključak stupa na snagu danom donošenja, a o njegovoj realizaciji start će se Stručna služba Gradskog vijeća.

Ad.6. - Izvještaja o radu Komisija Gradskog vijeća Zavidovići za period 01.01.- 30.06.2022. godine.

Gradskom vijeću vezano za Izvještaj o radu Komisije za pitanja boraca i tekovina Odbrambeno-oslobodilačkog rata obratio se predsjednik Komisije Adis Mahovac.

U raspravi učestvovali: Admir Fojnica, Refik Ćatić, Zahid Avdičević i Šemso Fehrić.

Šemso Fehrić predlaže da izvještaji o radu komisija Gradskog vijeće Zavidovići, ubuduće treba da budu odvojeni za svaku komisiju, te da Gradsko vijeće Zavidovići neće razmatrati izvještaje komisija Gradskog vijeća Zavidovići, ako ne budu formirane preostale dvije komisije.

Predsjedavajuća Gradskog vijeća konstatuje da je Gradsko vijeće sa 25 glasova ZA, 0 PROTIV, 1 UZDRŽANIH (odsutni vijećnici: Demir Buljubašić, Fehim Tuzlić i Maja Bajramović) prihvatilo prijedlog Šemse Fehrić da izvještaji o radu komisija Gradskog vijeće Zavidovići, ubuduće treba da budu odvojeni za svaku komisiju, te da Gradsko vijeće Zavidovići neće razmatrati izvještaje komisija Gradskog vijeća Zavidovići, ako ne budu formirane preostale dvije komisije.

Predsjedavajuća Gradskog vijeća konstatuje da je Gradsko vijeće sa 15 glasova ZA, 8 PROTIV, 3 UZDRŽANIH (odsutni vijećnici: Demir Buljubašić, Fehim Tuzlić i Maja

Bajramović) prihvatilo Izvještaj o radu Komisija Gradskog vijeća Zavidovići za period 01.01.-30.06.2022. godine sa zaključnim razmatranjima.

ZAKLJUČAK

1. Gradsko vijeće Zavidovići usvaja Izvještaj o radu Komisija Gradskog vijeća Zavidovići za period 01.01.-30.06.2022. godine, sa zaključnim razmatranjima:

- pozivanjem predsjednika komisija na sjednice Gradskog vijeća, omogućit će se detaljnije informisanje Gradskog vijeća o izvještajima komisija;
- nastaviti započete aktivnosti na formiranju preostalih radnih tijela Gradskog vijeća Zavidovići;

- izvještaji o radu komisija Gradskog vijeće Zavidovići, ubuduće treba da budu odvojeni za svaku komisiju;

- Gradsko vijeće Zavidovići neće razmatrati izvještaje komisija Gradskog vijeća Zavidovići, ako ne budu formirane preostale dvije.

2. Zaključak stupa na snagu danom donošenja, a o njegovoj realizaciji start će se Stručna služba Gradskog vijeća.

Ad.7. - Izvještaj o radu Komisije za utvrđivanje prometne vrijednosti nekretnina za period od 01.01.2022. do 30.06.2022. godine.

U raspravi nije bilo učesnika.

Predsjedavajuća Gradskog vijeća konstatuje da je Gradsko vijeće sa 27 glasova ZA, 0 PROTIV, 0 UZDRŽANIH (odsutni vijećnici: Demir Buljubašić i Fehim Tuzlić) prihvatilo Izvještaj o radu Komisije za utvrđivanje prometne vrijednosti nekretnina za period od 01.01.2022. do 30.06.2022. godine.

ZAKLJUČAK

1. Gradsko vijeće Zavidovići usvaja Izvještaj o radu Komisije za utvrđivanje prometne vrijednosti nekretnina za period od 01.01.2022. do 30.06.2022. godine.

2. Zaključak stupa na snagu danom donošenja.

Sjednica Gradskog vijeća završena je u 16.05 sati.

Sastavni dio ovog Izvoda iz zapisnika čini tonski snimak koji se, shodno članu 97. stav 4. Poslovnika o radu Općinskog vijeća Zavidovići, trajno čuva u arhivi Vijeća i dostupan je na uvid javnosti.

ZAPISNIK SAČINILA

Hajrudina Hadžić

OVJERAVA

SEKRETAR GV- a

Samira Pinjić, dipl. pravnik

PREDSJEDAVAJUĆA

GRADSKOG VIJEĆA

mr. iur. Erna Merdić Smailhodžić